

Pulih kad memori

ADAKAH cara untuk memulihkan semula kad memori yang tidak boleh dibaca?

-TIAN, Raub.

Pada hari ini, sesebuah kad memori boleh didapati di kedai pada harga yang murah. Namun begitu, data yang tersimpan di dalamnya sangat bernilai dan tidak boleh diperolehi daripada tempat lain sekiranya sebuah kad memori itu rosak atau tidak boleh dibaca.

**Diskusi
ICT**



Bersama **FIRKHAN**
sembangict@yahoo.com

Selagi kad memori itu tidak rosak secara fizikal, ia masih boleh dicuba untuk dipulihkan. Seterusnya dibincangkan beberapa cara yang boleh digunakan untuk memperbaiki kad memori yang rosak agar

data yang terdapat di dalamnya dapat dibaca semula.

1 Keluarkan kad memori tersebut daripada telefon pintar, kamera digital dan sebagainya. Bersihkan di bahagian kakinya yang berwarna gangsa atau kuning dengan bahan sesuai seperti menggunakan pamadam dan sebagainya. Seterusnya, masukkan semula kad memori itu ke dalam peralatan yang digunakan.

2 Sekiranya cara pertama tidak berjaya, boleh dicuba dengan

menghubungkan peralatan yang digunakan sama ada telefon pintar, kamera digital dan lain-lain kepada komputer dengan menggunakan kabel data. Pastikan mod sambungan adalah dalam mod mass storage media dan bukannya mod media *transfer mode*. Pada program *Windows Explorer*, klik kanan pada pemacu peralatan tersebut dan pilih *Properties>Tools>Error Checking*. Klik butang *Start* dan tunggu sehingga selesai. Akhirnya, cuba baca kad memori tersebut.

3 Bagi penggunaan telefon pintar, masuk ke pilihan *Options>Memory>Total Space>Repair*. Tunggu sehingga selesai proses pemulihan. Bagi peralatan berasaskan sistem Android, boleh pergi ke pilihan *Setting>Storage>Erase SD Card*. Namun begitu, cara ini memulihkan kad memori tetapi akan berlaku kehilangan data di dalamnya.

Kadangkala, komputer dapat membaca isi kandungan kad memori tetapi peralatan digital yang digunakan tidak dapat

baca kad memori tersebut. Oleh itu, perlu buat salinan pendua bagi data yang terdapat dalam kad memori ke dalam komputer yang digunakan. Seterusnya, kad memori tadi diformatkan semula. Sekiranya kad memori sudah pulih, boleh salin semula data yang diperlukan ke dalamnya.

Kemudian, selain penggunaan kabel data untuk dihubungkan ke komputer, penggunaan kad pembaca atau *card reader* boleh digunakan untuk sesebuah komputer membaca kad memori tersebut.